



**PRIMEIRO
MINISTRO**

**ALOKUSAUN SUA ESELÉNSIA
PRIMEIRU-MINISTRU
REPÚBLIKA DEMOKRÁTIKA TIMOR-LESTE,
DR. RUI MARIA DE ARAÚJO,
IHA BIBAN SERIMÓNIA LANSAMENTU LIVRU “LAMETA”**

Díli
25 fulan maiu tinan 2017

Eselênsia sira

Señor ex-Prezidente Repúblika Demokrátika Timor-Leste no Prémio Nobel Dame nian, Dr. José Ramos-Horta

Kolegas membru Governu nian

Señor Prezidente no Diretor Ezekutivu Arkivu & Muzeu Rezistênsia Timorens

Belun di'ak, no autór ba livru, João Crisóstomo no espoza

Distintu konvidadu sira

Señora Señor,

Uluk nana'in ha'u hakarak agradese ba ita nia belun, João Crisóstomo, tanba nia hi'it an ona mai iha ne'e, ohin, hafoin hakut tasi hosi Estados Unidos Amérika. Maibé ha'u hakarak mos agradese, hodi Governu no povu Timor-Leste nia naran, tanba obra hirak ne'ebé nia fo ona mai ita hanesan prezente: Painél hirak kona-ba ninia entrega ne'ebé ita foin asiste ne'e no obra ne'ebé nia rasik, nu'udar di'ak liu ema seluk, sei apresenta tuir mai, livru LAMETA.

Iha setembru tinan liu ba, durante viajen traballu ida ba Estados Unidos Amérika, ha'u hetan ksolok hodi koñese pessoal ho João Crisóstomo.

Iha altura ne'ebá nia koalia mai ha'u kona-ba LAMETA, katak liafuan sigla iha inglés atu fo naran "Movimentu Luzu-Amerikanu ba Autodeterminasaun Timor-Leste" no nia hatudu mos mai ha'u "*dossier*" ida ne'ebé nia rai iha ne'ebá, purezemplu, eskritu, rekorte jornal nian sira, fotografia sira no karta sira.

Maibé la'os "naran-naran" eskritu, rekorte jornal, fotografia no karta ida. Buat sira ne'e hotu hanesan testemuñu hosi saida maka LAMETA, ka tuir livru ne'e rasik refere, "família LAMETA" halo durante tinan barak nia laran mai ita Timor-Leste no mai ita timor oan.

Autór livru ida ne'e nian, ba ema sira ne'ebé seidauk koñese nia, nu'udar ema ida ho kauza no determinasaun sira. Luzu-amerikanu João Crisóstomo ne'e uluk nia maka impulsiona kampaña ida iha Estados Unidos Amérika kona-ba gravura arte rupestre (fatuk-ku'ak) iha Foz Côa, patrimóniu UNESCO nian, no kona-ba habelar informasaun relasiona ho Aristides Sousa Mendes, Kônsul portugéss ne'ebé ema uitoan deit iha país ne'ebá koñese.

Iha kauza hirak ne'e nia laran, nia hako'ak ita nian, ita nia luta ba autodeterminasaun. Ne'ebé sai multiplika liu hosi kontaktu sira. Kazu ne'e fahe tiha ba tarefa no atividade sira. No hodi ida ne'e maka ema barak halibur an ba ita nia kauza hodi foti ita nia lian, ne'ebé hakilar hosi dook, kilómetru rihun ba rihun. Buat ida deit ne'ebé João Crisóstomo la halo maka atu hamenus ninia esforsu sira.

LAMETA organiza tiha ona asaun protestu nian sira iha Organizasaun Nasoens Unidas, nia hakerek ba iha uluk Prezidente Bill Clinton, nia haruka petisaun ida ba nia ho asinatura liu

1.200 ne'ebé mai hosi Estadu norte-amerikanu 50, nia hakerek karta barak ba Nelson Mandela no nia dala barak telefone la sura, ba Nelson Mandela nia gabinete.

Iha faze seluk ita nia istória nian, nia haruka mai Timor-Leste kontentor hirak ho bein sira, ajuda finanseira ne'ebé comunidade portugés sira halibur liu hosi eventu sira. Nia mos hato'o ona mai ita, ninia orasaun, solidariedade no ninia fiar ba valór hirak umanizmu nian nia hatudu ho sinseridade amizade ida klean tebes.

No hanesan uitoan hosi buat hirak ne'e hotu, ha'u bele dehan "uitoan" tanba grandeza hosi lifaun hirak hotu no hahalok hirak hotu LAMETA nian sei labele tau hotu iha livru ida, ne'ebé ohin apresenta ba Ita Boot sira.

"Kontribuisaun deskoñesidu hosi comunidade luzo-amerikana ba independénsia Timor-Leste" nian, tuir Ita Boot sira bele lee iha kapa livru nian, oras ne'e sai koñesidu no konxiente ba timor oan tomak.

Tanba ne'e maka, apresentasaun livru ida ne'e nian no entrega painél sira hanesan "Timor 1975"; "LAMETA iha defende Timor-Leste"; "Ami husu referendu iha Timor-Leste" no "Belun sira Timor nian" – painel hirak ne'e hotu uza hodi sensibiliza comunidade amerikana ba kauza Timor-Leste nian – sei permite atu rikusoin hirak hadau hosi inimigu iha Arkivu no Muzeu Rezisténsia Timorensa bele sai riku liu tan no bele halo sai perpétuu ita nia istória, hodi fo hatene ba ema hotu – hahú hosi sira ne'ebé ki'ik liu to'o sira ne'ebé otas boot liu, hanesan vizitantes timor oan ka internasionál – apoiu inkondisionál hosi ita nia belun boot no maun-alin sira ne'ebé haklekar iha mundu rai klaran no sira fo ona kontribuisaun hodi apoia ita nia luta ba independénsia.

No tanba ita nia istória hetok oras ne'e sai kompletu, ha'u konvida Ita Boot sira atu lee LAMETA.

Ikusliu ha'u hakarak agradese, belun di'ak, ita nia hasoru malun iha loron 23 fulan setembro liu ba no promessa katak Ita sei entrega ba ami nia Arkivu no Muzeu Rezisténsia Timorensa dokumentu hirak ne'ebé Ita Boot koalia mai ha'u, promessa ne'ebé ohin cumpre duni.

Ba "família LAMETA", ne'ebé representa hosi ninia Prezidente, ami nia sinseridade no obrigadu ida klean tebes! Ha'u husu atu Ita Boot bele lori hosi Timor-Leste hako'ak ida metin tebes ba sira hotu.

Kmanek wa'in.

Dr. Rui Maria de Araújo
25 fulan maiu tinan 2017